

Sing vooraf: Psalm 22:11

Ons hulp is in die Naam van die Here wat die hemel en die aarde geskape het. Geliefdes, genade en vrede vir u van God ons Vader en die Here Jesus Christus deur die kragtige werking van God die Heilige Gees.

Amen.

Lofpsalm 35:12

Geloofsbelydenis: Nicea

Na die wet bely ons voor God ons sondeskuld en bid vir vergewing van ons sondes met Psalm 32:1, 3.

Wet

Psalm 32:1, 3

Gebed

- **Doksologie:**
- **Aanbidding:**
- **Skuldbelydenis:**
- **Vergifnis:**
- **Dank:**
- **Smeking vir die nood van die gemeente en voorbidding vir die kerk, owerhede en sondige wêreld, asook die beroep op die beloftes van God:**
- **Algemene bede:**
- **Verligting van die Gees ter wille van die Woorddiens:**

Amen.

Psalm 69:3

Skriflesing: Hebreërs 13

Teks: Hebreërs 13:20, 21; Kategismus Sondag 30

Mag die God van die vrede, wat die groot Herder van die skape, naamlik onse Here Jesus Christus, deur die bloed van die ewige testament uit die dode terugbring het, julle volmaak in elke goeie werk, om sy wil te doen, deur in julle te werk wat welbehaaglik is voor Hom deur Jesus Christus aan wie die heerlijkheid toekom tot in alle ewigheid! Amen.
(Hebreërs 13:20-21 AFR1953)

Geen mens kan glo en aanhou glo as die Here nie hierdie geloof in hom vestig en ook bevestig nie.

- Ons kan nie namens/vir mekaar glo nie.
- Maar ons kan wel vir mekaar bid.

Dit is presies wat in hierdie gedeelte gebeur.

- Die skrywer bid dat die gemeente se geloof versterk moet word.
- Dit is baie opvallend hoe en waardeur die gemeente se geloof versterk moet word:
 - Die God van vrede moet dit doen.
 - Hy doen dit deur die middelaarswerk van die Here Jesus Christus.

Die gelowiges reageer daarop deur twee dinge te doen:

- Hulle doen goeie werke wat vir God welbehaaglik is.
- Hulle gee aan die Here Jesus Christus die eer.

Die dinge is natuurlik alles van toepassing op die Nagmaal, want dit is gepas dat ons biddend tot die Here, maar ook biddend vir mekaar, na die Nagmaal toe kom. Natuurlik is dit so dat ons eie lewe moet pas by ons gebede.

Ons gee aandag aan die volgende sake:

1. Wat glo ons van die offerande van die Here Jesus Christus?

2. Waar pas selfondersoek by die offerande van die Here Jesus Christus?

1. Wat glo ons van die offerande van die Here Jesus Christus?

Die Here Jesus het aan die kruis gesterf tot verlossing van die mense wat almal in Hom glo.

- Dit is ook dié mense oor wie Hy sy Heilige Gees uitgestort het
 - sodat hulle biddend kan leef,
 - en sodat hulle Hom ook onder die leiding van sy Gees sal dien en vereer.
- Hierdie mense is ons.

Een van die middels wat die Here Jesus gegee het om ons aan hierdie verlossingsgebeurtenis te herinner, is die viering van die Heilige Nagmaal.

- Hy het dit ingestel as 'n maaltyd – nie as 'n voortdurende offer, soos wat dit in die Ou Testament was nie.

Daar staan in Hebreërs 7:27, 28 dat die Seun van God die ware Hoëpriester was en dat Hy net een offer gebring het, en dit was toe Hy Homself geoffer het.

. . . wat nie elke dag nodig het, soos die hoëpriesters, om eers vir sy eie sondes offers te bring en dan vir dié van die volk nie. Want dit het Hy net een maal gedoen toe Hy Homself geoffer het. Want die wet stel as hoëpriesters aan mense met swakhede, maar die woord van die eedswering wat ná die wet gekom het, stel die Seun aan, wat vir ewig volmaak is. (Hebreërs 7:27-28 AFR1953)

Die Nagmaal is 'n herinnering aan hierdie gebeurtenis.

- Die maaltyd by die Heilige Nagmaal vestig ons geloof op ons deelname aan die offer van Christus.
- By hierdie maaltyd word ons geleer dat ons volkome versoening van al ons sondes ontvang het van Jesus Christus ons Here af.
- Die sakrament beeld sigbaar uit dat ons fisies deel het aan die verlossingswerk van die Here Jesus.

Die feit is dat die Here Jesus Christus self by sowel die breek van die brood as by die uitdeel van die beker konstateer dat die versoening wat Hy oor ons sondes bewerk het, volkome is.

Dit beteken die volgende:

- Die Here Jesus Christus se soenoffer is volmaak.

- Dit beteken dat ons geen eie bydrae hoef te maak vir ons saligheid nie, want sy bydrae is volkome.
- Dit beteken ook dat ons by niemand of niks anders hulp hoef te soek nie (en ook nie kan soek nie).

Daarom is die bedoeling dat hierdie maaltyd ons met 'n baie groot en diep innerlike vreugde moet vol maak.

- Die bedoeling is ook verder dat die gelowige wat aan die Nagmaaltafel aansit, die Here Jesus werklik ken.
- Die bedoeling is ook dat elke Nagmaalgebruiker dit geestelik sal ervaar dat hy/sy ingelyf word in 'n lewende en 'n ewige gemeenskap met die Here Jesus Christus.
- Die ware gelowige sal aan die Nagmaalstafel die vrede ervaar dat hy weer van nuuts af glo dat niks en niemand hom van God kan vervreem nie.

2. Waar pas selfondersoek by die offerande van die Here Jesus Christus?

By Nagmaal het ons met die belangrike saak te doen dat dit vir ons tot 'n seën is as ons die Nagmaal reg gebruik, maar dat dit sonde is as ons dit verkeerd gebruik.

- Vir die mense wat met 'n ware geloof hulle deelgenootskap in die verbond beleef, is die Nagmaal tot 'n seën omdat dit vir hulle 'n sigbare bewys is dat hulle en nog ander deel in die verlossingsgemeenskap met die Here.
- Maar enige mens kan nie sommer net in 'n verhouding van gemeenskap met die Here staan nie – daarom moet elke Nagmaalganger homself eers deeglik ondersoek.
- Nou help dit ook nie veel as jy jouself ondersoek en dit bly daarby nie. Jy moet sleg voel oor die verkeerde dinge wat jy by jouself kry.
- Die kennis wat ons opdoen oor ons sondes, moet by ons die besef wakker maak dat ons sondes stry teen die heiligheid van God, en ook teen die heiligheid wat Hy weer in ons bewerk het deur die soendood van sy Seun Jesus Christus.
- Die evangelie belof juis aan elke een wat berou het, volkome vergifnis van sy sondes.

Dié dinge alles saam behoort ons te beweeg om weer vreugde in ons heiligmaking te ervaar.

Selfondersoek is dus selfontdekking met 'n lewe wat daarna volg waarin daar gebreek word met sonde.

- Selfondersoek saam met berou en bekering werk altyd groei in die geloof.
- Enige iemand wat eerlik na homself kyk, sien by homself tekens van die dood – nie net in sy sonde self nie, maar ook in sy eie gesindheid teenoor sy sondes.

Elke ware gelowige se berou is gegrond op twee dinge:

- Die eerste is dat hy weet dat hy die heiligheid van God skend,
- maar die tweede is dat hy ook besef dat die Here Jesus Christus nie gemeenskap hou met mense wat Hom nie gelowig wil aanvaar en dien nie.

Daarom is die opdrag van die Here aan die kerk ook so skerp!

- Diegene wat nie tot bekering wil kom nie, moet doodgewoon van die Nagmaal af weggehou word.
- Die afhouding van die Nagmaal af moet hulle gewete dringender met hulle laat praat sodat hulle van hulle sondes afstand kan doen.

Dit is hier waar die sakrament van die Nagmaal versterkend intree.

- Daar is mense wat sondig, maar wat nie daarin verhard nie – hulle stry, maar verloor dikwels teen die sonde.
- Die Nagmaal leer aan sulke mense dat God ook vergewe.
- So veel dat Hy selfs sy Seun laat sterf het om sondaars se sondes te straf – sodat hulle nie as gevolg van hulle sondes deur sy oordeel vernietig sal word nie.
- Maar dan bly die eis dat sulke mense werklik opreg en voluit teen die sonde moet veg.

Die troos van die Nagmaal maak dat ons weer in Christus se krag kan opstaan, en dat ons ook weer na sy stem wil luister.

- Dan het ons weer moed om verder te lewe.
- By die Nagmaal ervaar ons die mildheid en sagtheid van God se liefde.
- Ook die geluk van sy genade.

Mag die God van die vrede, wat ons Here Jesus Christus deur die bloed van die ewige testament uit die dode teruggebring het, ons ook vol maak in elke goeie werk. Mag Hy ons lei met sy Heilige Gees dat ons sy wil doen, en dat ons die Here Jesus Christus, aan Wie die heerlijkheid toekom tot in alle ewigheid, dien met ons hele lewe! (Al hierdie beginsels is saamgevat in ons belydenis in die Heidelbergse Kategismus Sondag 30.).

Amen.

Slotgebed

Skrifberyming 1-1:5 (24:5)

Die genade van die Here Jesus Christus en die liefde van God en die gemeenskap van die Heilige Gees bly by u almal.

Amen.

*Dr MJ du Plessis
Gereformeerde Kerk Bellville
Datum: 29 April 2007 (oggend)*